

OPOMENA KORISTI VJERNICIMA!

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji traže znanje, primaju pouke i trude se da budu bolji.

Uzvišeni Allah u Kur'anu Časnom poručuje: "**Ti opominji, a opomena će vjernicima sigurno koristiti!**" (Ez-Zarijat, 55.)

Braćo moja u Dini Islamu! Do mene već godinama dolaze informacije o tome kako moje hutbe pogađaju ljude, tj. da se u njima mnogi pronalaze i osjećaju prozvanim. Reakcije sa njihove strane su različite. Neki od njih su mi se zahvalili, jer nisu vidjeli svoje propuste i mahane sve dok ih nisam spomenuo u hutbi, pa su ih zatim analizirali te odlučili da se poprave i promijene svoj život nabolje. Drugi su se opet naljutili na mene, jer smatraju da svojim hutbama ciljам upravo na njih, pa mi onda prigovaraju ili se drugima žale na moje prozivke.

Istina je, naime, slijedeća: Moto mojih hutbi jeste upravo ovaj spomenuti ajet. Smatram da se u svojim hutbama obraćam vjernicima i da će im zato moje opomene koristiti. U svojim hutbama nikada nikog do sada nisam imenom prozvao, niti ću to ikada u budućnosti učiniti. Prozivati nekoga na hutbi imenom jeste znak govornikovog lošeg karaktera, čin nepoštovanja prema ljudima te suprotavljanje praksi Allahovog Poslanika, s.a.v.s. Jer Muhammed, s.a.v.s., nikada nikog nije direktno kritikovao niti prozivao. Uvijek je u indirektnoj upitnoj formi govorio: "Šta je ljudima pa čine to i to?" Ako bi se nekom direktno obraćao, onda ne bi kritikovao već bi savjetovao.

S druge strane, u svojim hutbama pokušavam široko da obuhvatim teme i da spomenem različite slučajeve, pa tako i slučajeve iz prošlosti ili iz drugih džemata (nešto što sam čuo ili lično doživio), tako da je apsolutno nemoguće da se hutba odnosi samo na jednog čovjeka ili na manju grupu ljudi. Također treba znati da se moje hutbe ne čitaju samo u Austriji već i u mnogim drugim državama. To je činjenica koja mi, naravno, imponuje ali me ne oholi, i koja govori da moje hutbe nisu isključivo vezane za džematlije džemata Izet Nanić Dornbirn, već su posvećene svima onima koji imaju želju da ih čitaju, jer su problemi u svim džematima i kod svih ljudi manje-više isti.

Nadalje, to što sam u poziciji Imama koji ima priliku da drži hutbu, uopće ne znači da sam ja savršeni i bezgriješni čovjek. U svojim hutbama uvijek krećem od sebe i vrlo često pronađem ili prozovem samoga sebe. Ali, za razliku od nekih ljudi ja ne hodam naokolo i ne govorim drugima u čemu sam se pronašao, već gledam da to u čemu sam se pronašao popravim. Svako od nas treba i ustvari bi morao da radi na sebi, prije svega radi svoga ličnog blagostanja, a onda i radi blagostanja drugih u svome okruženju, prvenstveno svoje porodice a onda i rodbine, prijatelja i sudžematlija.

Da sumiramo ovo do sad rečeno. Dakle, moje hutbe nisu usmjerene ni protiv koga lično od vas. U njima nikad nisam i nikad neću nikoga javno prozvati. Ko se osjeti prozvanim, neka mi ne zamjeri već nek mi halali i pokuša sebe da popravi. U svojim hutbama (dokle god ih budem držao) govorit ću o stvarima i temama koje se tiču i ovog ali i drugih džemata i džematlija, a sve sa ciljem da opomenem i sebe i druge, tj. da i ja a i drugi uzmemo pouku i popravimo svoje stanje. Nema bezgriješnih ni savršenih. Ko misli da takvih ima, taj žestoko griješi! Dokle god je čovjek živ, neprestano treba da radi na sebi i da se trudi da bude bolji. Krajnji cilj, i moj i vaš, treba da bude Allahovo zadovoljstvo, a ne zadovoljstvo naših strasti, ega i hirova.

Na kraju, želim da naglasim još jednu stvar. Kao Imam ovog Džemata imam i pravo i obavezu, ne samo da opominjem već i da svojim džematlijama uvijek budem na raspolaganju za sva vjerska pitanja. U tom smislu vas molim i pozivam da se ne ustručavate da mi usmenim ili pismenim putem zatražite da vam objasnim vjerske propise. U sticanju znanja nema stida i srama. Naravno, zbog svog posla i obaveza nisam uvijek u mogućnosti da odmah odgovorim, ali ću gledati što prije da se javim. Ako vam je nekad hitno, a nisam vam se uspio javiti, pošaljite mi poruku i objasnite o čemu se radi, pa ću ja požuriti koliko je to moguće da vam odgovorim.

U svojim odgovorima ću se pozivati na stečeno znanje iz Kur'ana, Sunneta, Hanefijskog mezheba, Maturidijskog akaida te Bošnjačke tradicije. Odgovore koje ne nađem u svojoj glavi, potražit ću kod naše ugledne uleme, koja se u svojim odgovorima također poziva na spomenute izvore. Vaša potreba za sticanjem znanja ne smije biti neostvarena, vaša pitanja ne smiju ostati neodgovorena. Zato, bujrum! Gradimo našu zajednicu i gradimo sebe kroz zajednicu!

Molim Dragog Allaha da učini da savjeti i opomene pronađu put do nas i do našeg srca, da nas uputi pa da se njima okoristimo, i da nam omogući da njihovim prihvatanjem pronađemo put do Njegovog zadovoljstva i Dženneta. Amin.